

SCHNAPPLüftli

E Infobledli für unseri Gönner

Uusgoob 2/2018





Erschynigswyys: 2 x pro Joor
Uflaag: 150 Exemplaar
Drugg: Marcel Portmann

Gstaltig und
Redaggtion Roger Müller
Adrässe: Roger Müller
Bahweg 2
4202 Duggingen

mueller-email@bluewin.ch

Bruchts nümml!
Ende Faasnacht ...

Helge uf dr Titelsytte:
D Menu-Karte 2018 vom Bruune Mutz





Stand Summer 2018 bin iich zimmlig sicher, dass miir au im Joor 2019 wiider wärde Faasnacht mache – d Froog drbii isch aifach ... wie und in wellere Form!?

Als Obmännli von dr erschte Stund (sprich im 36igschte Joor!) bluetet miir e weeneli s Härz, wenn ich an d Faasnacht, im Zämmehang mit de Luftschnapperli, dängg . Nachdäm miir über 30ig Joor, und das ooni grösseri Fluggtuazioone, zämme d Faasnacht gnosse hänn, bröggeled sit öbbe 3-4 Joor Stügg für Stügg drvoo ewägg. S isch klar, miir alli wärde nid jünger und mööge halt (zum Dail) au nimm esoo wie friener.

Au klar isch, dass Stillstand und aifach immer wiider s gliiche e schlächte Rootgääber isch. S Probleem drbii isch offensichtlich, dass jeedi & jeede e weeneli en anderi Uffassig drvoo het, was & wie d Faasnacht soll sii und das nadürrig unbestritte au e jeedem si guets Rächt isch. Aggduell goots in Richtig, dass «me» zu mene gwäälte (schööne) Goschdüüm, im Noochgang no e bassends Süsché drzue suecht und bestimmt. Bi gspannt wie sich das in näggschter Zitt no wird entwiggle.

Bassend zue dääre Situazioon und für mii au seer iischniidend isch, dass miir dr Stamm vo unserem Spiil sit dr Gründig vor 35 Joor immer hänn könne zämme bhalte und laufend au immer hänn könne e weeneli erwittere und versterge. Jetzt het aber unseri (un)haimligi Obfrau, d Schaggi, nach eme joorelange Kampf entscheide, dass si kümftig nimm hinde, sondern im Vordraab möchte laufe. Dä Entschaid duet uns zwar brutaal wee, isch aber absolut verständlig und miir dangge dr Schaggi, dass si esoooo laaaaang duurebisse het.

Sii woont jo sit über 40 Joor im Wälschland und ka esoo au (praggdisch) nie an unserer wüchendlige Pfifferstund drbii sii. Trotdäm het si bis dasjoor duureghebbt und das vedient unsere allerhöggschte Respäggt – dangge Schaggi!

Nach dääne doch rächt noochdängglige, fascht scho druurige Woote, dörf ich zum Schluss jetzt aber doch au no über öbbis brichte, wo miir uns jetzt scho fescht druff fröie dörf.

Aalässig unserem 35igschte Jubi wärde miir jo wie scho aakündet, zämme mit unserne Gönner, am **24. Novämber 2018, e gmainsame Oobe haa und fiire.**

Das soll au wiider emool e Danggerschöön sii an unseri tolle Gönner, wo uns in viile Fäll scho Joorelang beglaite und unterstütze. Die entsprächendi lilaadig liggt dääre Schnapplüftli-Ussgoob bii und miir würde n is wigglig ganz fescht fröie, mit viile vo öich Gönner an unserem Jubi-Oobe gmainsam z fiire.

E wunderschööne Räscht-Summer und gueti Gsundhait wünsch öich alle

dr Marco
s' Obmännli vo de Luftschnapperli

Unser Obmaa
vo dr erschte Stund.
Am 14. Meerz 2011 näb dr hütige
„Bangsionärin“ Sendi und em Ruthli.





Faasnacht 2018: E bitz e schpoote Rüggblick, aber ewentuel weiss me jez nümm soo viil, dorum kas jo widder interessant sii

Die „sponti“Sujet-Idee vom Roger isch jo an der Sujet-Sitzig gut akoo und denn het au d Umsetzig aigentlich rächt toll usgsee. An dr Faasnacht denn - und eher no schpöter an der GV - hets Stimme gää, wo s Goschdym gar nit soo toll gfunde hänn. „Nie mee so e Schei... Goschdym ussem Internet! “Wie au immer, mir hänn e tolli Faasnacht kaa und s Wätter isch au um ainiges besser gsii, wie im letsche Joor.

Immerhin isch das Goschdym e ächti Box-Marke gsii! Dr Mull und d Sandra hänn do guet recherchiert. Denn hämmer au no richtige Boxhändsche bekoo, wenn au total ussangschierti und stinggigi ...Aber die sinn vo dr Boxschuel vom SchwergwichtlerArnoldGjergjaj gsi . Dangge im andere „Heavyweightler“ - Mull- für's organisiere.





„Es isch e Grampf mit däm Kampf!“, so hets
Sujet ghaisse. Mol luege was im 2019 kunnt.

Vilicht heisst s Sujet denn eso: „E Goschdym
ussem Internet schisst mi aa,
jetzt zien mir widder emol öbbis Prächtigs
aa! ;-)

Am Zyschtig hämmer denn widder emol unser
Stammgoschdym aakaa, dr Pierott. Im 2019
laufe mr denn widder „charivari-mässig“
am Zyschtig.

Am Morgestraich isch denn au no äxtra d Sendi
mitem Jupp us Köln aagreist. Und au witteri
Gescht sind mit uns gloffe. Soo toll gsii. Und
am Zyschtig Nomidaag isch no dr „Bangsionär“
Kutti mit em Voordraab ummezooge.



Bummel



Dr **Jubi-Bummel** isch ins seer schöne **Colmar** gange. Dange im OK - Marco und Mull. Wyy-Deguschtazioon, Kanalfäärtli, fein Ässe. Alles isch drbii gsii.





Am spezielle **Jubi-Ussfluug** (Fryig bis Sunntig) simmer uf **Wien** gflooge. Au do saage mir vorallem widder im Mull Danke, wo vom Marco unterstützt worde isch. In däre tolle Stadt isch au alles drby gsii: Sissi-Schloss, Stadtrundfahrt, Markt, tolls Hotel. Im Prater, uffem Riiserad - sogar mit Privat-Gondel und Apéro! S beriemte Wiener-Schnitzel het au nit dörfe fääle. Brutali Mögge sinn das gsi! Mir hänn soo miesse lache, aber ussgässe het niemer.

Au schön isch gii, dass dr Ralph und Kölle-Sendi als „Bangsioniert“ drbii gsinn.





Dasmol hämmer näbscht de alte Bilder no e glains Quiz für öich parat.

Anhand vo de alte Bruefsbezeichnigge, sötte dir erkenne, was die Lüt schaffft oder was si gmacht hänn.



- A) Dienschtblolze
- B) Banggmaischter
- C) Diirligyyger
- D) Schäärmuuser
- E) Fiirkaiffler
- F) Basemänter
- G) Kundi
- H) Bammert



Bilder vo oobe nach unde:

- Begge, 1959
- Marktplatz 1868
- Fischmär (kei Aagoob zum Joor)

Linggs unde: e Gschirrlaade, bim Seevogelbrunne 1887





Simon Honegger

Dr Simon (genannt Simi) isch au syt Joore Gönner vo uns. Au är isch aggtive Faasnächtler und drummet bym Dupf-Club. Me kennt de Simi au bi BCO Alemannia, wo jo au in unser Netzwärgg ghört ...

Name: Simon Honegger
Alter: 32
Bruef: Product Manager
bi dr Mäss Basel



Wenn iich e Läbensmittel wär, wär ich
E Chilli Schote: Usse elegant, inne scharf.

Gits öbbis, wo di amigs maaslos ergeret?
Lüt wo nid usässe.

Het di kürzlig öbbis Speziells seer gfreut?
Won y erfahre ha, dass d Gabi (mini Fründin), und dr Tim (ihre Soon) und ich im Summer wärde zämme zieh.

Vom Bsuech vom däm Ort root ich ab:
Dr Luftschnapperli Käller, denn do han iich am andere Daag immer e dumme Kopf, weiss aber nüm wieso!

Über was kasch du härzhaft lache?
Em Mull sy Promillemässgrät.

Was hesch well wärde, wo 10 gsi bisch?
Radiomoderator.

Hesch als Kind e Färnsee Serie gluegt, wo di magsch erinnere?
Dr Flipper natürligg!

Welle Song kasch du immer widder loose und findisch du einfach genial?
«Geh mal Bier holen» vom Mickie Krause. Dä Songteggscht isch eifach e Granate.

Mitere Zytmaschiine würd iich e Abstächer mache nach:
An 15.07.2018 und luege, wär Fuessball-Wäldmeischer wird. Mit dere Info würd iich mir denn e Zuestupf bim Wette verdiene.

(Üübrigens: das Interview isch vor dr WM gsii...)

Du gwünsch e Kurztrip nach Waal für drey Dääg. Wo aane got die Reis?
Hamburg während em Schlagermoove.

Du hätsch als „König“ vo Basel e Wunsch frei, was wär das?
Dass d Faasnacht e Wuche lang goot.

Di Lieblingslokal zum Ässe in unserer Region
Kunnt druff aa, uf was iich Luscht ha.
Bürgerligg: Rest. Harmonie, Asiatisch: Thai Family, Italiänisch: Rest. Roma

Als Hänkersmoolzyt wurdi bstelle:
1. Vorspiis: E Basler Ziiibesuppe, 2. Vorspiis: Filetto di manzo, Hauptgang: Thailändischs Green Curry und s Dessert: e Käsblättli. Drzue e Fläsche Primitivo di Manduria Sessant'anni

Für was hesch s letscht mol sinnlos Gäld ussgää?
Kleider, konkret e Winterjagge.

Du hesch 100 Frangge und muesch die verschängge. An wär?
An d'Gabi, mini Fründin, drmit si mir mit däm Gäld ka Glaider kaufe

An Basel und Umgäbig schetz ich am meischte:
Dr Rhy und dass alles so nooch isch. Basel isch e grosses Dorf.



Zerscht dr Dangg!

Divärsi Persoone und Gönner hänn uns miteme Zuestupf no zuesätzlich e Batze in Kasse gää oder suscht öbbis offeriert. Das schetze mir natürlig seer und dangg dorum:

De **Müller's vo Birsfälde und dr Mia**. Wyter danke mr em **Urs Schenker**: är het e Rundi Frikadelle zaalt im Rumpelkäller.

E Dangg au an d **Knochestamper-Waggis!** Als Gägeleischtig vo unserem Ständeli am Faasnachtsmändig, hämmer dörfe e Spänd entgege nää und denn simmer erscht no bewirtet worde am Bummel in lirem Cliquelokal am Stapfelbärg 4! Super gsii!

Denn an däre Stell nomol e Dangg **allne Mitwirkende vo dr Yschällete**. S Niveau vo de **Bängg** isch grossartig gsii. Leider sinn d **Spitzbuebe** usgfalle dasmol C.U. im 2019!


Denn gratuliere mir!

Nochträgglich nomol de **Heumattrueche**. Die sinn im 1988 gründet worde und hänn somit **30 Joor** gfiirt. Wie zr domolige Zyt bi dr Gründig im Heumattstübli bim Baanhof, hets an der Yschällete e halbs Poulet im Körbli gää vo uns Luftschnapperli.

Und das beste Fasnachtskostüm des Jahres geht an... #fasnacht #Basel



Knochestamper-Waggis
Faasnacht 2018.



BZ Basel vom 23.2.18: Dä Boxer pyfferlet und sinniert yber die letschte drey Dääg ...

gangs-Kläppli von den Strassen verschwinden, wenn am Sonntag der erste Bummel vorstättengeht, dankt auch das Faschnachts-Comité auf seine eigene Art:
 LNE, wo naye, umm is gams.
 Dangscheen sage mir drum alle.
 Bis im Nyrzäl nimmuch e Schlag,
 noo isch d Wältkultuur scho zruag.



Nur noch wenige Stunden, Minuten, dann war es am Mittwoch vorbei. HOLLAND SCHMIDT

Termin scho glii:

Jubi-Oobe mit de Luftschnapperli
Samschtig, 24. Novämber 2018

Temin 2019:

5 Jänner: Blaggedde-Ussgoob im Käller
11. bis 13. Meerz: Faasnacht

Lösige vom Quiz (s alte Basel)

- A) Dienschmaitli
- B) Metzger
- C) faarende Musiker
- D) Maulwurffänger
- E) Marktverkäufer
- F) Seidenbandweber
- G) Landstreicher
- H) Bannwart



SALON DE BEAUTÉ ESTHER
Eidg.geprüfte Kosmetikerin (Bigalehre)
Esther Kunz
*KOSMETIK VON KOPF BIS FUSS FÜR
SIE+ IHN*

BAHNHOFSTRASSE 12
CH - 4147 AESCH
TEL. : 061 751 89 33
ÖFFNUNGSZEITEN:
DIENSTAG - SAMSTAG von 9 h. bis 19 h.
www.esther-kunz-beauté.ch

proacteam
mehr als Sie erwarten



All in one

gestalten
layouts nach Corporate Design
plotten und printen
kreative Bildretusche
wwwweben und mehr...
www.proacteam.ch

www.luftschnapperli.ch